

《王風·黍離》

《毛詩序》：

黍離。閔宗周也。周大夫行役至于宗周。過故宗廟宮室。盡為禾黍。閔周室之顛覆。彷徨不忍去。而作是詩也。

原文：

彼黍離離。彼稷之苗。
行邁靡靡。中心搖搖。
知我者。謂我心憂。
不知我者。謂我何求。
悠悠蒼天。此何人哉！

彼黍離離。彼稷之穗。
行邁靡靡。中心如醉。
知我者。謂我心憂。
不知我者。謂我何求。
悠悠蒼天。此何人哉！

彼黍離離。彼稷之實。
行邁靡靡。中心如噎。
知我者。謂我心憂。
不知我者。謂我何求。
悠悠蒼天。此何人哉！

黍離 三章 章十句